

Na osnovu člana 14. Zakona o zaštiti ličnih podataka ("Službeni glasnik BiH" broj: 12/25) i člana 56. Zakona o organizaciji organa uprave u Federaciji Bosne i Hercegovine ("Službene novine FBiH", broj:35/05), ministar za kulturu, sport i mlade Tuzlanskog kantona d o n o s i:

PRAVILA PRIVATNOSTI

Ministarstva za kulturu, sport i mlade Tuzlanskog kantona

1. UVOD

Ministarstvo za kulturu, sport i mlade Tuzlanskog kantona, na adresi: Rudarska 65, 75000 Tuzla (u daljnjem tekstu: Ministarstvo), kao kontrolor podataka, brine o prikupljanju, korištenju i otkrivanju ličnih podataka koji se obrađuju prilikom izvršavanja poslova i obaveza iz nadležnosti Ministarstva, u skladu sa Zakonom o zaštiti ličnih podataka („Službeni glasnik BiH“, broj 12/25), (u daljem tekstu: Zakon).

Cilj Pravila privatnosti Ministarstva jeste da, u skladu sa članom 7. Zakona, svim licima čiji se lični podaci obrađuju osigura transparentnost obrade i omogućiti razumljive informacije o njihovim pravima i načinu ostvarivanja tih prava.

2. SVRHA OBRADJE LIČNIH PODATAKA I PRAVNI OSNOV

Ministarstvo lične podatke obrađuje isključivo uz saglasnost nosioca podataka, na njegov zahtjev i u svrhu obrade podataka u okviru postupaka koje Ministarstvo vodi u oblasti kulture, sporta i mladih, te na temelju obaveza, izvršavanja zadataka od javnog interesa i legitimnih interesa Ministarstva.

Ministarstvo prikuplja i obrađuje lične podatke radi obavljanja svojih službenih dužnosti, i to:

- a) od zaposlenika i osoba na stručnom osposobljavanju radi izvršavanja obaveza poslodavca prema zaposlenicima i osobama na stručnom osposobljavanju, uključujući vođenje kadrovske evidencije, bolovanja i administrativnih obaveza koje proizilaze iz radnog odnosa. Ministarstvo može na zahtjev zaposlenika obrađivati podatke članova porodica zaposlenika, i to u onoj mjeri u kojoj je takva obrada nužna radi izvršavanja obaveza Ministarstva kao poslodavca prema zaposleniku, u skladu s važećim propisima i pravima utvrđenima Kolektivnim ugovorom za državne službenike i namještenike u organima uprave i sudske vlasti u Tuzlanskom kantonu.
- b) od fizičkih osoba radi obavljanja poslova iz djelatnosti kulture, sporta i mladih obrađujući lične podatke osoba koje su polagale stručni ispit u bibliotečkoj djelatnosti i stekli stručno zvanje na osnovu Pravilnika o stručnim zvanjima, uslovima i načinu sticanja stručnih zvanja u bibliotečkoj djelatnosti („Službene novine TK“, broj 3/01 i 7/18); lične podatke osoba koje su polagale stručni ispit u arhivističkoj djelatnosti i stekli stručno zvanje na osnovu Pravilnika o arhivističkim-arhivarskim zvanjima, uslovima i načinu sticanja osnovnih i viših stručnih zvanja u arhivskoj djelatnosti („Službene novine TK“, broj 1/13, 3/13, 7/14 i 7/18) i lične podatke stručnih lica osposobljenih za rad u sportu koji su podnijeli zahtjev za upis u Registar pravnih osoba u oblasti sporta na osnovu Pravilnika o sadržaju i načinu vođenja registra fizičkih osoba u oblasti sporta na području Tuzlanskog kantona („Službene novine Tuzlanskog kantona, broj:2/22 i 8/25).

Pristup ličnim podacima navedenih kandidata imaju isključivo osobe uključene u provedbu pojedinog postupka.

- c) od aplikanata – fizičkih osoba koje podnose prijave na javne pozive Ministarstva u oblasti kulture, sporta i mladih, za dodjelu finansijskih sredstava i drugih oblika podrške, a na osnovu odluka Vlade Tuzlanskog kantona koje se donose za svaku kalendarsku godinu, kojima se utvrđuju uslovi, kriteriji i postupci za raspodjelu sredstava iz nadležnosti Ministarstva.

Pristup ličnim podacima navedenih kandidata imaju isključivo osobe uključene u provedbu pojedinog javnog poziva (članovi komisije i službenici zaduženi za plaćanje).

3. WEB STRANICA MINISTARSTVA

Web stranica Ministarstva <https://mksmtk.gov.ba/> informativnog je karaktera. Ne prikuplja se aktivno praćenje korisnika za svrhe marketinga. Podaci o pristupu serveru (npr. IP adresa, datum i vrijeme pristupa) mogu se privremeno obrađivati u svrhe tehničke funkcionalnosti i zaštite stranice. Na web stranici Ministarstva dostupna je kontakt forma putem koje korisnici mogu dostaviti upit, a koja zahtijeva sljedeće podatke: ime i prezime, e-mail adresu i sadržaj poruke. Podaci dostavljeni putem kontakt forme obrađuju se u svrhu odgovora na upit i vođenja komunikacije s nosiocem podatka. Kontakt forma obrađuje samo podatke koje je korisnik dobrovoljno dostavio. Ministarstvo ne koristi kolačiće za praćenje korisnika (tracking cookies) osim onih neophodnih za funkcioniranje web stranice.

4. ROKOVI ČUVANJA PODATAKA

Lični podaci čuvaju se onoliko dugo koliko je potrebno za realizaciju svrhe obrade, te nakon toga u rokovima propisanim zakonima i drugim propisima iz oblasti arhivskog poslovanja, u skladu s Listom kategorija registraturne građe s rokovima čuvanja Ministarstva.

Lični podaci objavljeni na web stranici Ministarstva čuvaju se onoliko dugo koliko je potrebno da se ostvari svrha njihove objave, odnosno dok postoji zakonska ili stvarna potreba za njihovom dostupnošću, nakon čega se uklanjaju sa stranice, pri čemu se trajno pohranjuju u arhivi Ministarstva u skladu s propisanim rokovima čuvanja, ali više nisu javno dostupni.

5. PRAVA NOSIOCA PODATAKA

U skladu sa zakonom, nosioci podataka imaju sljedeća prava koja mogu ostvariti podnošenjem zahtjeva Ministarstvu:

- **Pravo na pristup ličnim podacima** – Nosilac podataka ima pravo da dobije potvrdu obrađuje li Ministarstvo njegove lične podatke, kao i da ostvari uvid u sadržaj tih podataka. Ovo pravo obuhvata i pribavljanje kopije podataka koji se obrađuju.
- **Pravo na ispravku** – Nosilac podataka ima pravo zahtijevati da se netačni ili nepotpuni podaci isprave bez nepotrebnog odgađanja. Ministarstvo je dužno izvršiti ispravku u skladu sa Zakonom i osigurati tačnost evidencija.
- **Pravo na brisanje („pravo na zaborav“) i izuzeci** – Nosilac podataka ima pravo zahtijevati brisanje svojih podataka kada oni više nisu potrebni za svrhu za koju su prikupljeni ili kada je obrada nezakonita. Ovo pravo ne može se ostvariti u slučajevima kada je obrada nužna radi ispunjavanja zakonske obaveze, izvršavanja službenih ovlaštenja ili arhiviranja u javnom interesu, u skladu sa posebnim propisima.
- **Pravo na prenosivost podataka** – Nosilac podataka ima pravo da svoje podatke dobije u strukturiranom, uobičajeno korištenom i strojno čitljivom formatu, kada se obrada zasniva na saglasnosti ili ugovoru, te da ih prenese drugom rukovaocu bez prepreka.
- **Pravo na prigovor** – Nosilac podataka ima pravo uložiti prigovor na obradu koja se zasniva na javnom interesu ili legitimnom interesu Ministarstva. U slučaju prigovora, Ministarstvo je dužno preispitati osnov obrade i, ukoliko je potrebno, obustaviti ili prilagoditi obradu.

- **Pravo na žalbu** – Nosilac podataka ima pravo podnijeti žalbu Agenciji za zaštitu ličnih podataka BiH ili drugom nadležnom organu, ukoliko smatra da su povrijeđena njegova prava u vezi sa obradom ličnih podataka.

Ministarstvo je dužno omogućiti ostvarivanje ovih prava u Zakonom propisanim rokovima.

6. PRIJENOS PODATAKA TREĆIM LICIMA

Ministarstvo može prenijeti lične podate trećim stranama samo kada je takav prijenos propisan zakonom, kada je neophodan radi izvršavanja zakonskih obaveza ili ostvarivanja prava korisnika, uključujući provjeru dostavljenih podataka od nadležnih institucija, kada je nužan radi izvršavanja ugovornih obaveza prema poslovnim partnerima uz prethodno osigurane odgovarajuće pravne i sigurnosne mjere, te kada nosilac podataka da izričitu saglasnost za takav prijenos, pri čemu se svaki prijenos vrši uz primjenu adekvatnih tehničkih i organizacijskih mjera zaštite.

7. SIGURNOST LIČNIH PODATAKA

Ministarstvo primjenjuje odgovarajuće tehničke i organizacijske mjere zaštite, uključujući: kontrolu pristupa, šifriranje prilikom prijenosa osjetljivih podataka, redovne sigurnosne kopije, obuku zaposlenih o zaštiti podataka te provođenje procjena rizika i redovito ažuriranje sigurnosnih mjera.

8. SLUŽBENIK ZA ZAŠTITU LIČNIH PODATAKA

Tel: +387 35 283 558

E-mail: szzlp.mksm@tk.kim.ba

9. KONTAKT KONTROLORA

Ministarstvo za kulturu, sport i mlade Tuzlanskog kantona

Rudarska 65, 75000 Tuzla

Tel: +387 35 369 352

E-mail: mksm@tk.kim.ba

10. IZMJENE PRAVILA PRIVATNOSTI

Ministarstvo zadržava pravo da u svakom trenutku izmijeni ili dopuni ova Pravila privatnosti, u skladu sa promjenama propisa ili potrebama praktične primjene. Sve eventualne izmjene biće blagovremeno objavljene na službenoj web stranici Ministarstva.

**BOSNA I HERCEGOVINA
FEDERACIJA BOSNE I HERCEGOVINA
TUZLANSKI KANTON**

Broj: 11/1-02-3863 /26

Tuzla, 12.02. 2026. godine

